

L215

AWIG-AWIG
DESA ADAT BATUGUNUNG



DESA BUKIT
KECAMATAN KARANGASEM
KABUPATEN KARANGASEM

MURDHA WAKYA

Om Swastyastu

Purwa pangastungkaran tityang Krama Desa Adat Batugunung, ring buk padan Ida Sang Hyang Widhi maka sangkan paraning dumadi, Bhatara-bhatari sane malinga ring Pura Puseh Desa Adat Batugunung, minakadi Pura kahyangan sami sane wenten sajroning wawengkon Desa Adat Batugunung, dwaning malarapan saking kerta wara nugrahan paduka Bhatara Samudhaya, karya puniki kasidha puput.

Kaping kalih hatur pangayubagyan tityang krama Desa Adat Batugunung, pingajeng ring ida dane para Panglingsir, Keliang, Pamangku, minakadi ida dane sang maraga cestakara, widagdha pradnyan wicaksana sareng sami, sane sampun sangkaning sueca ledang sareng mapawangun ngaripta uger-uger marupa awig-awig Desa Adat Batugunung puniki, pacang kangen sepat siku-siku sajeroning desa kantos kaungkur wekas.

Taler majeng ring Pamerintah Daerah Kabupaten Karangasem, para manggala sane mastika ngiwang patutang awig-awig, tityang ngaturang pangayu bagia, duaning sampun kasidhan nureksa maritetes saha mastika kantos marupa puput.

Mungwing daging ipun manut Tri Hita Karana, indik kahyangan genah ngadisthana Ida Sang Hyang Parama Wisesa. Indik pawongan pinaka krama desa, indik palemahan pinaka wawidhangan wawengkon desa, mabantang antuk lekita sastra-gama, sasana, pasuara, dresta, minakadi sane siosan, sane anut ring pamargin dharma-agama kalih dharma-nagara. dumadak kasidhan mamanguhang kajagadhitan sakala niskala.

Om santih santih santih Om.

NIYASA



ARTOS LOGO

<i>No.</i>	<i>Gambar</i>	<i>Artos</i>
1.	Sinar Swastika	Sinar Suci lan Niyasa Agama Hindu
2.	Padi Lan Kapas	Gemuh Landuh Sandang lan Pangan
3.	Daun Padi Lan Kapas	Bumi landuh lan Asri
4.	Candi	Lingih suci yanggra Umat
5.	Rante	Paiketan Krama Desa lan dresta tami katami musti tetep kawerdiang.
6.	Gunung	Desa Adat Batugunung wentene ring Wawidangan Giri Lempuyang
7.	Asep tatiga	Madasar Tiga Sakti (Brahma, Wisnu lan Siwa) tur Ngawerdiang daging Tri Hita Karana
8.	Satyam Siwam Sundaram	Maparilaksana manut Tattwa, Susila lan Acara sane Patut lan trepti wastu sida kapanggih Kaluihan lan Kasucian.

KATAKAWAN DESA ADAT



Desa Adat Kabupaten Batak - Sumatera Utara

WAWIDANGAN DESA ADAT BATUGENUNG



DAGING AWIG-AWIG
DESA ADAT BATUGUNUNG

MURDHA WAKYA	i
NIYASA	ii
KATATTWAN DESA	iii
WAWIDANGAN DESA	iv
DAGING AWIG-AWIG	v
PRATHAMAS SARGAH : ARAN LAN WAWIDANGAN DESA	1
DWITYAS SARGAH : PIKUKUH MIWAH PATITIS TATUJON	1
TRITYAS SARGAH : SUKERTA TATA PAKRAMAN	2
Palet 1 : Indik Krama	2
Palet 2 : Indik Tata Praja Desa Adat	4
Palet 3 : Indik Sangkepan lan Paruman	7
Palet 4 : Indik Kulkul	8
Palet 5 : Indik Duen Desa	9
Palet 6 : Indik Laluputan	10
Palet 7 : Indik Dadosan Patedunan	11
Palet 8 : Indik Baya	11
Palet 9 : Indik Rarampagan lan Kekeran Desa	12
Palet 10 : Indik Panyanggran Banjar, Krama Desa	12
CATURTAS SARGAH : SUKERTA TATA AGAMA	12
Palet 1 : Indik Dewa Yadnya	12
Kaping 1 : Indik Kahyangan	12
Kaping 2 : Indik Pangaci-aci	13
Kaping 3 : Indik Pamangku	15
Kaping 4 : Indik Sukerta Pura Kahyangan	16
Kaping 5 : Indik Cuntaka, miwah Sosot	17
Palet 2 : Indik Resi Yadnya	19
Palet 3 : Indik Pitra Yadnya	20
Palet 4 : Indik Manusa Yadnya	22
Palet 5 : Indik Bhuta Yadnya	22
PANCAMAS SARGAH : SUKERTA TATA PALEMAHAN	23
Palet 1 : Indik Tegal, Bangket lan Karang	23
Palet 2 : Indik Kakayonan	24

Palet 3	: Indik Wawangunan	25
Palet 4	: Indik Wawalungan	26
SAT SARGAH : SUKERTA TATA PAWONGAN		28
Palet 1	: Indik Rangkat	28
Palet 2	: Indik Palas Makurenan utawi Nyapian	29
Palet 3	: Indik Balu	29
Palet 4	: Indik Sentana	29
Palet 5	: Indik Wawarisan	30
SAPTAMAS SARGAH : WICARA LAN PAMIDANDA		30
Palet 1	: Indik Wicara	30
Palet 2	: Indik Pamidanda	31
ASTAMAS SARGAH : NGUWAH-NGUWUHIN AWIG-AWIG		31
NAWAMAS SARGAH : PAMUPUT		32

**PRATHAMAS SARGAH
ARAN LAN WAWIDANGAN DESA**

Pawos 1

- (1) Desa puniki mawasta Desa Adat Batugunung, salantur ipun kinucap kalih kasuratang sajeroning lekita Desa Adat Batugunung.
- (2) Wawengkon prabumian Desa Adat Batugunung mawates nyatur-desa, manut sakadi kinucap ring sor puniki :
 - ha. Tepisiring Wetan utawi Kangin : Panepin Kulon prabumian Desa Adat Jumenang;
 - na. Tepisiring Kidul utawi Kelod : Panepin prabumian Desa Adat Bukit;
 - ca. Tepisiring Kulon utawi Kauh : Panepin Wetan prabumian Desa Adat Sekargunung;
 - ra. Tepisiring Lor utawi Kaler : Panepin Kidul Wana Giri Lempuyang.
- (3) Sajeroning wawengkon Desa Adat Batugunung, wenten banjar mawasta Banjar Adat Batugunung.

**DWITYAS SARGGAH
PIKUKUH MIWAH PATITIS TATUJON**

Pawos 2

Maka pikukuh Desa Adat Batugunung, ngarajegang, mikukuhin, kalih mitindihin pisan :

- ha. Pancasila.
- na. Undang-Undang Dasar 1945.
- ca. Tri Hita Karana.
- ra. Peraturan Daerah Provinsi Bali Nomor 4 Tahun 2019, Tentang Desa Adat di Bali

Pawos 3

Desa Adat Batugunung ngamanggehang patitis tatujon, luiripun :

- ha. Ngutamayang tata-cara maagama Hindu;
- na. Ngawangunang katreptian sajeroning desa adat, mangda kasidan rajeg katreptianing praja;
- ca. Ngawerdiang kawicaksanan minakadi kapradnyanan, maka larapan gumawe gemuh landuhing praja;
- ra. Ngamanggehang kalih ngawerdiang padueaning desa, majalaran kawicaksanan guna laksana manut dharma-prawerti;
- ka. Ngarajegang Dharma-Agama miwah Dharma-Nagara.

TRITYAS SARGGAH
SUKERTHA TATA PAKRAMAN

Palet 1

Indik Krama

Pawos 4

- (1) sane kasinanggeh krama desa, luire :
- ha. Sang sapisira ugi jenek magenah ring wawengkon Desa Adat Batugunung, lintang ring enem sasih utawi 210 (satak dasa) dina sane rajeg maagama Hindu;
 - na. Sang sapisira ugi wed saking Desa Adat Batugunung, jenek magenah ring liwaring Desa Adat Batugunung, nanging kantun mipil ring banjar utawi Desa Adat Batugunung, sane mula pagenahania nguni.
- (2) Papalihan krama desa, kadi inucap ring sor puniki :
- ha. Krama Ngarep Mawed inggih punika krama desa sane bulangkep wed saking Desa Adat Batugunung, sane sampun mipil ring banjar utawi ring Desa Adat Batugunung matata turun cumek saha maayahan saurah-arih;
 - na. Krama Ngarepinggih punika krama desa sane bulangkep, mawit saking liwaring Desa Adat Batugunung sane sampun mipil ring banjar utawi ring Desa Adat Batugunung matataturun cumek saha maayahan saurah-arih;
 - ca. Krama Truna inggih punika lanang minakadi istri sane kaselir kabuatang antuk Desa, jagi nyanggra saraja karyan desa sane kaunadikayang antuk Prajuru Desa;
 - ra. Krama nyada inggih punika krama desa sane sampun tan keni ayahan wit sangkaning pinunas ngaraga tur sampun kalugra antuk Prajuru Desa mawiwit saking :
 - 1) Mabukti sungkan rahat tur tan sida waras;
 - 2) Antuk lingsir tan sida maayahan, miwah sampun mayusa 70 (pitung dasa) warsa;
 - 3) Sangkaning kasundul antuk okane sane pinih unkur marabian.
 - ka. Krama balu inggih punika krama desa lanang wiadin istri, sane katinggal seda antuk rabinya, krama desa lanang sane kakawonin nyapian antuk rabine, wenten balu camput, wenten balu masentana;
 - da. Krama ring liwaring desa, inggih punika sang sapisira ugi wed saking Desa Adat Batugunung, jenek magenah ring liwaring Desa Adat Batugunung, nanging manggeh mipil ring banjar utawi ring Desa Adat Batugunung.
- (3) Krama Tamiu inggih punika karma sane kinucap ring sor puniki :
- ha. Sang sapisira ugi wed saking liwaring Desa Adat Batugunung, jenek magenah ring wawengkon Desa Adat Batugunung;
 - na. Sang sapisira ugi wed saking liwaring Desa Adat Batugunung, makakubon ngenahin palemahan minakadi : tegal, carik, palasan, ring wawengkon Desa Adat Batugunung, nanging kari manggeh makrama desa ring kamulan desania,

kabuktyang antuk sewala patra sasinahan saking Kelihang desania.

- (4) Tamiu inggih punika sang sapisira ugi magenah ring wawengkon Desa Adat Batugunung, yan tan magama Hindu, tan sareng sapisiraning Agama Hindu ring Desa Adat Batugunung;
- (5) Sang sapisira ugi rauh ka jroning Desa Adat Batugunung, nanging tan nekeh magenah irika, kasinanggeh Tamiu ngajag, sang karauhan Tamiu patut matur supeksa ring Prajuru Desa, yan tan asapunika, Prajuru Desa wenang nundung Tamiu inucap mangda matinggal saking desa.

Pawos 5

Ngawit tedun makrama desa :

- (1) Krama Desa sane mawed saking Desa Adat Batugunung, malarapan antuk tateragan desa, luire : sampun bulangkep, saha sampun mawiwaha, katerag tedun makrama desa sasampun pawiwahane mamargi 6 (nem) sasih.
- (2) Sang sapisira ugi sane wed saking liwaring desa, magenah ring wawengkon Desa Adat Batugunung, sampun lintang ring 3 (tigang) sasih utawi 105 (satus lima) dina katerag antuk desa nemonin rahina Radite Umanis tatkala Sangkepan Desa saha sampun kajantenang malarapan antuk lekita saking desania;
- (3) Sang sapisira wed saking Desa Adat Batugunung, matinggal ka liwaring desa, wastu malih mawali ka Desa Adat Batugunung :
 - ha. Yan sangkaning rahayu kalih saking palugrahan Prajuru Desa patinggale nguni, wenang mawali mipil ring sinalih tunggil banjar ring Desa Adat Batugunung, nganutin sukertan desa;
 - na. Yan sangkaning tan rahayu patinggale nguni, yoga katengahang babaose ka desa, mangda kabaosan antuk Prajuru Desa, manut pamutus pararem, prasida mipil pinaka krama Desa Adat Batugunung.

Pawos 6

Usan makrama desa ring Desa Adat Batugunung, malarapan antuk :

- ha. Seda;
- na. Sangkaning pinunas ngaraga, saha polih palugrahan Prajuru Desa;
- ca. Tedah utawi tilar saking Agama Hindu;
- ra. Kasepekang saha kaheladang antuk desa.

Pawos 7

- (1) Swadharmaning krama desa :
 - ha. Krama Ngarep, yoga keni payah-ayahan, tata-turun nyumek, nyanggra saraja karyan desa, manut ungguan soang-soang;

- na. Krama Truna, yogya nyanggra saraja karya ritatkala aci, sane katiwakang antuk desa manut dresta;
 - ca. Krama Balu lanang sane madue sentana istri miwah krama balu istri sane maduesentana lanang sane sampun napak wirang pateh sakadi krama ngarep;
 - ra. Krama desa ring liwaring desa, yogya ngaturang panaubka desa satunggilingayum wawangunan ring pura kahyangan amongan desa, gung artha manutpararem;
 - ka. Krama Tamiu yogya ngaturang panaubka desa ngamasa-masa, satunggil ngamargiang yadnya olih desa, gung artha manutpararem;
 - da. Tamiu tan sareng sapalikramaning agama Hindu, nanging tan wenang piwal ring Awig-Awig, Pararem Desa miwah pamutus Pararem Desa, sane ngindikang tata pawongan kalih palemahan;
 - ta. Krama desa samian yogya saturut ring daging Awig-Awig Desa, Pararem miwah Pamutus Pararem Desa, ngutsahayang mangda kasidan mapikolih sakadi patitis tatujon desa ne kinucap ring ayun, tumus mamangguhng kajagadhitaning praja;
- (2) Phalapeksaning krama desa :
- ha. Krama desa samian yogya polih pasayuban wiadin paroban saking desa, saluiring wiawaharania yogya kabaosang antuk Prajuru Desa manut tata titining wicara;
 - na. Krama desa samian patut ngalaksanayang Panca-yadnya sajeroning Desa Adat Batugunung, manut desa kala patra, sastra-agama, miwah nganutin siptan desa inucap;
 - ca. Krama desa miwah krama ring liwaring desa sane sampun mipil, wenang polih babagian layuban aci-aci saluiripun, tuas-tuasan, miwah sane patut katiba ring krama desa;
 - ra. Mapuankid inggih punika tan tedun maayahan, yogya saking panglokikan kalih palugrahan Prajuru Desa;

Palet 2

Indik Tata Praja Desa Adat

Pawos 8

- (1) Prajuru Desa Adat Batugunung, luire :
- ha. Bandesa;
 - na. Pamadhen Bandesa;
 - ca. Panyarikan Desa;
 - ra. Patajuh Panyarikan Desa;
 - ka. Juru Raksa;
 - da. Patajuh Juru Raksa;
 - ta. Juru Arah.

- (2) Sabha Desa Adat Batugunung, luire:
 - ha. Manggala sapisanan Angga;
 - na. Panyarikan sapisanan Angga;
 - ca. Angga
- (3) Kertha Desa Adat Batugunung, luire:
 - ha. Manggala sapisanan Angga;
 - na. Panyarikan sapisanan Angga;
 - ca. Angga
- (4) Banjar Adat, luire:
 - ha. Kelihang Banjar;
 - na. Panyarikan;
 - ca. Juru Raksa.

Pawos 9

- (1) Sane wenang kaadegang wiadin kamanggehang dados Prajuru Desa, luire :
 - ha. Krama Ngarep sane jenek magenah, makrama desa, matata turun cumek, mayahan saurah-arih ring Desa Adat Batugunung;
 - na. Tan cedangga, sakadi peceng, perot, cungh lan sapanunggilan ipun, sane katandangin kabakta saking wahu embas;
 - ca. Wikan mamaos kalih nyurat Aksara Bali utawi Latin;
 - ra. Mabukti tan naen malaksana corah.
- (2) Pidabdab ngadegang Prajuru Desa :
 - ha. Paruman Desa ngawentenang saseliran, pangawit Paruman Desa matujuang sang pacang kadegang dados Bandesa, yan kantos lintangan ring adiri sane katuju antuk Paruman Desa, yogya melarapan antuk nunas ica masrana antuk lekesan;
 - na. Mungguing ngadegang Pamadhen Bandesa, Panyarikan, Patajuh Panyarikan, Juru Raksa, Patajuh Juru Raksa lan Juru Arah saking panyudin Bandesa, sane kabriyukin antuk Paruman Desa;
 - ca. Lamine dados Prajuru Desa wantah limang warsa saking dina pangadegane sajaba kapadgatakalan minakadi sangkaning wenten wiawahara;
 - ra. Yan sampun naen madeg pinaka Prajuru Desa, dados kasudi malih;
 - ka. Yan wenten sinalih tunggil piwal kalaning kasudi antuk Paruman Desa, sang piwal punika wenang katiwakin panglokika, yan tan manut paksania yogya kabaosin antuk Paruman Desa, yan jati tuhu paksania, Paruman Desa wenang nyudi sane siosan.

Pawos 10

Swadharmaning Prajuru Desa :

- ha. Minabdabin desa, krama desa, pacang ngupadi kajagadhitan sakala niskala, maka darsana Awig-Awig Desa, Pararem Desa, pamutus Pararem Desa, nganutin uger-uger

- nagara minakadi sastra Agama Hindu;
- na Ngarancana saluiring utsahan Desa kahungkur, ngarancana saluiring sane nyandang pacang wangunang, sane patut ayum, manut lokika desa kala patra, sane mabuat, mangda kasidan polih palugrahan Sang Amawarat;
- ca Mamaosin saluiring wiawahara utawi wicara sane wetu sajeroning Desa Adat Batugunung, niwakang tatimbang, utawi pamutus babaos sane yogya kaputusan sajeroning desa adat. Yan tan kasidan kabaosan ring desa, Prajuru Desa mituduhang mangda ngaturang ring Sang Amawarat mangda kabaosan;
- ra Mratyaksa, nulingayang saparipolah Prajuru Desa. Luire, Kelihang Banjar, Pamangku-Pamangku Desa, Pamangku Kahyangan Jagat, minakadi sane siosan sane wenten sajeroning wawengkon Desa Adat Batugunung;
- ka Midabdabin saluiring pamargin aci-aci ring wawidangan Desa Adat Batugunung, taler nulingayang krama indike ngalaksanayang Panca-yadnya;
- da Prajuru Desa wenang nyanggra saluiring pituduh, minakadi saraja karya saking Sang Amawarat, werat utawi ringan, sane yogya katiwak ring desa adat.
- ta Nyanggra saraja karya ring pura Kahyangan Jagat sane kaempon antuk Desa Adat Batugunung;
- sa Pinaka duta pacang matemuang babaos ring sang sapisira ugi, yan painedikan punika kapineh nyandang pacang marginin;
- wa Wenang ngawangunang Pacalang Desa, sane patut nulinga katreptian sawawengkon Desa Adat Batugunung. Mungguing ngadegang, swadharma minakadi phalapeksa Pacalang mungguh sajeroning Pararem Desa;
- la Wenang ngawangunang sekaa-sekaa siosan, sane pacang ngaremba swadharma Prajuru Desa sane kabuatang;
- ma Prajuru Desa kaadegang majalaran antuk pawintenan sane kalaksanaang ring Pura Dalem Desa Adat Batugunung.

Pawon 11

- (1) Sane dados kaadegang wiadin kamanggachang maka Sabha Desa Adat Batugunung, inggih punika utusan saking banjar adat sane wikan ring adat saha Awig-Awig Desa, akeh ipun mangda asal;
- (2) Sabha Desa kaadegang olih Prajuru Desa Adat, mawaneng 5 (limang) warsa;
- (3) Swadharmaning Sabha Desa, sane madue wawenang ngaturang dharma tatimbang ring Prajuru Desa Adat;

Pawon 12

- (1) Sane dados kaadegang wiadin kamanggachang maka Kertha Desa; luire:
 - ha. Prajuru Desa Adat Batugunung, kamanggala antuk Bandesa Adat;
 - na. Utusan saking banjar adat sane wikan ring adat saha Awig-Awig Desa;
 - ca. Sapisira ugi krama desa ngarep sane kapineh patut manut pararem.

- (2) Kertha Desa kaadegang olih Prajuru Desa Adat, mawaneng 5 (limang) warsa, saha akeh ipun mangda gasal.
- (3) Swadharmaning Kertha Desa :
- ha. Madue wawenang nerima, nureksa miwah maosin sahananing wicara sane metu ring desa adat;
 - na. Dasar muputang wicara malarapan antuk Awig-Awig mingsinggihang para sparosarpana ya;
 - ca. Yan tan prasida puput wicarane, Kertha Desa patut ngaturang ring Majelis Desa Adat (MDA) manut papalihan.

Pawos 13

Phalapeksa Prajuru Desa, Sabha Desa miwah Kertha Desa :

- ha. Luput papeson minakadi raramon rikala ngaci manut pararem;
- na. Wenang polih tuas-tuasan;
- ca. Wenang polih pioli-oli saking gunakayan desa manut pararem;
- ra. Yan sajeroning kari madeg dados Prajuru Desa, Sabha Desa miwah Kertha Desa raris seda polih pangelad saking desa;
- ka. Yan sampun puput pangadege, patut kawentenang upacara pangelad saking desa manut pararem.

Pawos 14

Prajuru Desa, Sabha Desa miwah Kertha Desa kagentosin utawi usan, majalangan antuk :

- ha. Seda;
- na. Mabukti sungkan rahat tur sue kantos lintang awarsa;
- ca. Mapinunas sangkaning rahayu, saha polih lugraha saking Paruman Desa;
- ra. Tutug sengker pangadege;
- ka. Malarapan antuk iwang.

Palet 3

Indik Sangkepan lan Paruman

Pawos 15

Mungging Sangkepan lan Paruman Desa, kadi ring sor puniki :

- ha. Sangkepan Prajuru Desa magenah ring Bale Pasangkepan Desa Adat Batugunung wiadin genah siosan sanunggil ngasasih sadurung Sangkepan Desa;
- na. Sane patut nedunin Sangkepan punika Prajuru Desa, Kertha Desa, Prajuru Banjar Adat, Pamangku Desa, minakadi sang sapasiraugi sane kabuatang antuk Prajuru Desa;
- ca. Maka manggalaning mababaosan sajeroning Sangkepan, Paruman, manggeh Bandesa, wiadin sinalih tunggil Prajuru Desa saking palugrahan Bandesa;
- ra. Sangkepan Desa kawentenang satunggil Redite Umanis katedunin antuk krama desa Ngarep Mawed makasami;

- ka. Paruman Desa dados kawentenang padgatakala manut werat wirasane sane pacang kabaosang mawit saking pamutus Prajuru Desa sajeroning Paruman Desa;
- da. Banjar adat, pamaksan pura, sekaa-sekaa siosan, sane wenten sajeroning Desa Adat Batugunung tan kalugra ngawentenang sangkepan kalaning dina Sangkepan Desa, yan mamurug, yoga sangkepan sekaa inucap kawangdeang.

Pawos 16

Tata kramaning Sangkepan lan Paruman :

- ha. Saya patut makta pasayaan, tegap eteh-ete pasayaan, manut pagilih urak;
- na. Yan kapatut pacang nganggen babanten sakabuatan, Prajuru Desa, yoga mituduhang mangda cumawis, saha nyukserahang padagingan ring sang kapituduh makarya babanten;
- ca. Saya Desa wenang nepak kulkul, yan sampun carem kramane ngraris aturan punika kaantebang, mabiyuk muspa sareng sami, ngraris mababaosan kantos puput;
- ra. Babaosan sajeroning Sangkepan lan Paruman, ugi ngupadi karahayuan jagat, minakadi ngarajegang kamuruban Sang Hyang Widhi, majalaran bhawa laksana manut dresta;
- ka. Yan wenten sinalih tunggil ngatengahang babaos sajeroning Sangkepan lan Paruman, yoga kadamyakang, yan nyandang baosin, yoga rinaosan, yan tan nyandang baosin, antukang ring sang ngamimitin;
- da. Pamutus babaos, wiadin pararem sajeroning Sangkepan lan Paruman malarapan antuk briyuk sapanggul anut sang nyangkepin, yoga kalekitayang lan kalaksanaang;
- ta. Prade tan puput babaose sajeroning Sangkepan kantos ping tiga Sangkepane, patut katengahang sajeroning Paruman, pamutus babaos sajeroning paruman pinaka pamutus pamekas;
- sa. Sangkepan punika kabaos puput, yan sampun pamutus babaose kadamyakang, raris nimbang pagilih saya, saha sampun mabacak.

Palet 4

Indik Kulkul

Pawos 17

- (1) Sajeroning wawengkon desa, wenten babacakan kulkul, kadi ring sor:
 - ha. Kulkul Desa;
 - na. Kulkul Pura Kahyangan Tiga;
 - ca. Kulkul Pura Kahyangan tiosan;
 - ra. Kulkul Banjar;
 - ka. Kulkul sckaa-sckaa.
- (2) Mungguing suaran kulkul punika mangda mabhina-bhinaan sawiji soang, manut sor singgih;

- (3) Nepak kulkul manut Tri Brata Sandhi : dharma, sima, laksana, teges ipun :
- ha. Dharma sandhi : suaran kulkul maka cihna wiadin tatenger upacara agama wiadin yadnya;
 - na. Sima : suaran kulkul maka cihna wiadin tatenger Pancabaya;
 - ca. Laksana : suaran kulkul maka cihna wiadin tatenger patedunan.
- (4) Indik tatepakan kulkul manut pasobaya kuna dresta minakadi :
- ha. Atulud : patedunan;
 - na. Dwang tulud : Kaicalan;
 - ca. Tigang tulud : kasedaan;
 - ra. Kulkul bulus : Panca baya
- (5) Ungguan nepak kulkul :
- ha. Yan nepak kulkul tatenger patedunan, ugi kulkul sane kadue antuk sekaa, katepak antuk sang patut ngulkulang;
 - na. Yan nepak kulkul tatenger Pancabaya, wenang saungguan-ungguan, asing nampek genahe, wenang katepak antuk sang rihinan manggihin baya punika, minakadi saking pituduh sang ngawiwenangang;
 - ca. Yan nepak kulkul tatenger upacara agama, dewa yadnya, bhuta yadnya, manusa yadnya lan pitra yadnya, wenang kulkul sane wenten ring soang-soang genah upacarane;
 - ra. Yan kalaning ngalungayang bhataru, mendak bhataru, Bhataru turun kabeh, kalaning pacaruan desa, sami kulkule dados suaraang, tatepakan manut dresta;
 - ka. Yan wenten mamurug nepak kulkul tan manut dresta yogya kabaosin antuk Prajuru Desa katiwakan panglokika saha pamidanda manut pararem.

Palet 5

Indik Duen Desa

Pawos 18

Sane kadue antuk desa, luire :

- ha. Pura Kahyangan Tiga :
 - 1) Pura Desa;
 - 2) Pura Puseh;
 - 3) Pura Dalem.
- na. Pura Kahyangan Desa :
 - 1) Pura Tretepan Agung;
 - 2) Pura Prajapati;
 - 3) Pura Pangulun Setra;
 - 4) Pura Catus Pata.
- ca. Pura Kahyangan sane kaempon kaupapira kaaci-acinin antuk desa, luire :
 - 1) Pura Tirta Sunia Gangga;
 - 2) Pura Dalem Dasar Lempuyang;

- 3) Pura Anggreka Sari (Pura Melanting);
 - 4) Pura Tirta Sunia Merta;
 - 5) Pura Tirta Jaga Satru (Tirta Tunggang);
 - 6) Pura Tirta Danu Sawang;
 - 7) Pura Pasimpenan Agung;
 - 8) Pura Panataran Agung Silawana Hyang Sari;
 - 9) Pura Windhu Sari;
 - 10) Pura Tirta Sudhamala;
 - 11) Pura Tirta Empul;
 - 12) Pura Batu Panyangcangan;
 - 13) Pura Pasar Agung Tengah;
 - 14) Pura Tirta Kamandalu;
 - 15) Pura Tirta Manik Bulan.
- ra. Setra duang palebahan, luire : setra lingsir lan setra alit;
- ka. Palemahan sane kanggen margi lan rurung;
- da. Bale Banjar;
- ta. Tanah palabha Pura Desa, laba Pura Penataran Silawana Hyang Sari, tanah Ayahan Desa manut lekita tanah punika;
- sa. Sakancan kalebutan toya, Sane dados kanggen pasucian Ida Bhatara, Sane dados kanggen beji, miwah kasalud antuk krama desa, Sane dados tantan ka desa adat;
- wa. Pralingga Bhatara;
- la. saluiring usaha sane kadue antuk desa manut pararem.

Pawos 19

Piolih-olih desa, luire :

- (1) Piolih pamupon labha pura duen desa;
- (2) Urunan, panaub, pakenin-kenin pakaryan krama desa;
- (3) Aturan, dana punia;
- (4) Piolih-olih saking saluiring usaha sane kadue antuk desa.

Palet 6

Indik Laluputan

Pawos 20

- (1) Luput mapiteges nenten keni papeson.
- (2) sane luput papeson, luire :
 - ha. Prajuru Desa;
 - na. Pamangku Desa;
 - ca. Pamangku Kahyangan;
 - ra. Sang sapasiraugi sane kapineh antuk desa, manut pararem.

Palet 7
Indik Dadosan Patedunan
Pawos 21

Dadosan patedunan, Sangkepan, tedun makarya miwah sane siosan, nganutang sukerta soang-soang, luire :

- ha. Yan desa madue patedunane, yogya nganggen sukertan desa, sane kagaduh antuk desa, dadosan ngaranjing ka desa;
- na. Yan babanjaran madue patedunane, yogya nganggen sukertan banjar soang-soang sane sampun kagaduh antuk banjar punika. Dadosan ngaranjing ka banjar;
- ca. Yan subak madue patedunane, yogya nganggen uger sukertan subak sane sampun kagaduh antuk subak soang-soang, dadosane ngaranjing ka subak;
- ra. Yan sekaa-sekaa madue patedunane, yogya nganggen uger sekaa soang-soang, dadosane ngaranjing ka sekaa;
- ka. Yan wenten krama tan tinut ring tatepasan lan dadosan punika, wenang babaose katengahang ka desa, Prajuru Desa yogya mamaosin saha niwakang pamutus;
- da. Agung alit dadosan manut pararem.

Palet 8
Indik Baya
Pawos 22

- (1) Sane kinucap Panca-baya, luih ipun : jiwa baya, aghni baya, toya baya, artha baya, lan bayu baya;
- (2) Saluiring baya wenang gegerak antuk suaran kulkul;
- (3) Sang sapasira ugi krama desa sane manggihin, wiadin uning ring panangkaning baya, ring kang katiben baya, wenang ngegerak nepak kulkul manut indik kakulkulan baya, raris damyakang ring wadesa;
- (4) Rikala wenten suaran kulkul bulus tatenger baya, krama desa patut yatna, sayaga, saha sregep ngamong prabot wiadin gagaman soang-soang;
- (5) Yan sampun tatas ring baya punika, krama desa patut matatulung nambakin baya punika, manut ungguan, kalih manut patuduh sang yogya ngawiwenangang;
- (6) Sang sapasiraugi tan kawasa majajabur utawi majajarah, rikalaning desa lan krama desa katiben baya. Yan wenten kacirenan mamurug, yogya katengahang ka desa, wiadin katur ring Sang Amawarat;
- (7) Yan pinganan baya punika sampun kapineh nahnah, tan pacang nyangkalen wenang kacihnaang antuk suaran kulkul lambat atuludan, wiadin pasiar saking Sang Amawarat.

Palet 9**Indik Rarampagan lan Kekeran Desa****Pawos 23**

- (1) Tan kalugra nebtob, ngarebah, wit-witan saluir ipun, ring palasan, pategalan, abing, tangkid, alas miwah genah siosan sane kakekerantuk desa, yan wenten sinalih tunggil mamurug, katiwakan danda manut lokika, manut pararem, tur taru sane karebah mantuk ka desa sasampun polih panugrahan saking Sang Amawarat;
- (2) Saluiring wit-witan sane sampun kacirenan wiadin kasawenin antuk desa pacang mangge mapawangun ring desa, pradene punika karebah antuk sang madue, yogya sang madue katiwakin danda, manut lokika, manut pararem, taru wiadin wit-witan sane karebah mantuk ka desa, desa patut naur taru manut pangarga;
- (3) Sane wenang rampag, keker manut pidabdab ngarampag, ngeker mungguh sajeroningpararem.

Palet 10**Indik Panyanggran Banjar utawi Krama Desa****Pawos 24**

- (1) Saraja karyan desa kasanggra antuk krama desa kaunadikayang antuk Prajuru Desa;
- (2) Saraja karyan banjar kasanggra antuk krama banjar, soang-soang kaunadikayang antuk Kelihang banjar;
- (3) Yan wenten krama desa ngawangun yadnya suka duka, kengin nunas panyanggran desa.

CATHURTAS SARGGAH**SUKERTA TATA AGAMA****Palet 1****Indik Dewa Yadnya****Kaping 1****Indik Kahyangan****Pawos 25**

- (1) Pura sane kadue antuk desa, sane kaempon antuk desa, indik pangaci-aci manut dresta, gagaduhan kalih pasuaran desa;
- (2) Pura-pura kahyangan sane siosan sakadi kinucap ring ayun, papayon kalih pangaci-aci kaemponin antuk krama sane nyungsong Bhatara ring pura kahyangan punika soang-soang;
- (3) Mungguing beji, papayon kalih pangaci-acinia kaemponin antuk krama desa, yan wenten beji tan kaaci-acinin, toyan ipun tan yogya angge sadana sarwa suci;

- (4) Tan wenang nguwah-nguwuhin wawilangan palinggih bhatara, sane wenten ring pura kahyangan desa manut dresta, mangda kantun manggeh kadi kuna;
- (5) Yan wenten Pura Kahyangan sinalih tunggil reneng pangaci-acinia, kantos 10 (kadasa) warsan, yogya Prajuru Desa mamaosin, maritetes, ngutsahayang mangda kasidan mawali kadi jatimula. Nanging prade tan kasidan, majalaran antuk pamutus Paruman Desa, prasida desa ngawangunang pangupakara mralina pura punika, mangda tan karanjangan kaumahin antuk Ki Bhuta Kubandha;
- (6) Yan wenten pura sinalih tunggil magenah ring Desa Adat Batugunung, panyungsung miwah pangempon ipun sami magenah ring liwaring desa, yogya pangempon pura punika ngaturang punia sinunggil pacaruan Tilem Kasanga ring desa ngamasa-masa, napkala pangaci-aci ugi mangda masadok ring Prajuru Desa;

Kaping 2

Indik Pangaci-aci

Pawos 26

- (1) Soang-soang pura madue gagaduhan, pinaka uger pangaci-aci, miwah babanten;
- (2) Sane yogya muput aci-aci punika sulinggih sane katuhur antuk krama pura soang-soang, utawi kaanteb antuk Pamangku ring pura inucap manut kawenangannia;
- (3) Yan wenten pura sane kaempon antuk desa sane durung madue Pamangku, utawi pamangkune kapialang, dados nuur sinalih tunggil Pamangku Kahyangan Desa, prade taler tan mresidayang patut nuur sulinggih;
- (4) Pamangku pura punika wantah Pamangku Pura Desa, Pura Puseh, Pura Dalem, minakadi Pamangku Kahyangan sane wenten sajeroning Desa Adat Batugunung, kalugra nganteb banten pangodal, minakadi sane siosan ring pura-pura sawawengkon Desa Adat Batugunung sane mamuatang, taler manut kawenangan pamangku.

Pawos 27

- (1) Indik pangaci-aci Pura Pamerajan, Paibon, Dadia, punika kaamongin antuk krama desa sajeroning sekaa dadia, pamerajan, manut dresta;
- (2) Ritatkala usabha ring Pura Penataran Agung Silawana Hyang Sari, Pura Dalem Dasar Lempuyang, Ida Bhatara katuran malasti, masucian ka sagara utawi ka Pura Tirta Sunia Merta;

Pawos 28

- (1) Aci-aci, piodalan, usabha, pasegeh ring pura Kahyangan Desa dudonania manut dresta;
- (2) Indik rahina pengaci-aci, piodalan, usabha, pasegeh ring pura Kahyangan Desa luire:
ha. Pura Puseh, Pura Desa utawi Pura Bale Agung nganem sasih, usabha sasor ipun 3 (nigang) warsa kala dina Budha Wage Klawu;

- na. Pura Dalem miwah Prajapati, kala dina Budha Umanis Julungwangi 6 (nganem) sasih, usabha sasor ipun 3 (nigang) warsa;
 - ca. Ring rahina Budha Kliwon Pahang, piodalan ring Pura Panataran Agung Silawana Hyang Sari, miwah Pura Pasimpenan Agung, usabhanya sasor ipun 5 (limang) warsa;
 - ra. Ring rahina Purnama kalima, ngamasa-masa piodalan ring Pura Dalem Dasar Lempuyang, usabhanya sasor ipun 5 (ngalimang) warsa;
 - ka. Ring rahina Anggara Wage wuku Sinta piodalan ring Pura Angreka Sari, usabhanya sasor ipun 5 (ngalimang) warsa;
 - da. Ring rahina Purnama Kasa, ngamasa-masa piodalan ring Pura Windhu Sari utawi Pura Pangider Bhuwana, usabhanya sasor ipun 5 (ngalimang) warsa;
 - ta. Ring pura-pura sakadi Pura Tirtha Sunia Gangga, Pura Tirtha Sunia Merta, Pura Tirtha Jagasatru, Pura Tirtha Danu Sawang, Pura Tirtha Sudhamala, Pura Tirtha Empul, Pura Batu Panyancangan, Pura Pasar Agung Tengah, Pura Tirtha Kamandalu, Pura Tirtha Manik Bulan, katuran pangaci-aci satunggil pangaci-aci ring kahyangan sane kaempon antuk desa;
 - sa. Sajaba ngusaba, pangaci-aci siosan manut dresta, luire :
 - 1) Ring rahina Galungan krama desa ngamargiang upacara Galungan;
 - 2) Ring rahina Kuningan, ngamargiang upacara Kuningan saking Pura Silawana Hyang Sari kantos ka Pura Tirtha Manik Bulan, raris maprani.
- (3) Padagingan pengaci-aci saking:
- ha. Piturunan lan wawijilan krama desa;
 - na. Pioli-oli pagunakayan krama desa;
 - ca. Aturan-aturan sangkaning krama suka nirmala;
 - ra. Pioli-oli tanah-tanah palabha pura duen desa.
- (4) Rikala kabrebehan jagate, kageringan, katiben Panca baya, pinganan tan mersidaang ngaturang aci kadi patute, yogya Prajuru Desa miwah Pamangku Desa, ngaturang piuning ring Bhatara, masadhana babanten padhatengan, pacanangan maka cihna tan pegataci-acine. Ri wus mawali degdeg jagate, patut ngawangunang upacara Bhatara Turun Kabeh, masasirih makakobok ka sagara giri;
- (5) Yan rikala mamahayu, ngayum papayon, ring pura-pura kahyangan, pinganan tan puput kala dinaning piodalan, pangacine wenang rangkadang, nanging padhatengan, pacanangan, tan dados pegatang. Ri wus puput masasapuh saluire, malih mawali kadi nguni.

Kaping 3
Indik Sukerta Pura Kahyangan
Pawos 29

- (1) Rikalaning ngaturang aci-aci amung pamangku ring kahyangan punika sane dados munggah tedun ring palinggih-palinggih pura kahyangan inucap, taler kasarengin antuk Pamangku lan krama tiosan sane polih lugraha saking Pamangku Pura inucap utawi lugraha Prajuru Desa;
- (2) Pamangku sane wenang ngantebang banten ring pura, wantah pamangku sane kadue antuk pura punika. Yan tan madue pamangku ring pura punika utawi kapialang, dados nyarad pamangku siosan sajeroning Desa Adat Batugunung, saking palugrahan Prajuru Desa;
- (3) Tan kalugra masumpah, macoran, sajeroning pura kahyangan, sajaba sangkaning wicaran pura inucap, taler saking pabuat krama pura, utawi krama desa sane ngempon pura punika;
- (4) Tan kalugra wak capala, asta capala, pada capala, miwah sapanunggilan ipun, sajeroning pura kahyangan. Yan macihna wenten mamurug, wenten raris ngatengahang ka desa yogya tiniwakan danda pamarisudha kahyangan;
- (5) Tan kalugra malaksana kantos ngawetuang biota ring pura kahyangan. Yan wenten mamurug sang kapineh sampun napak wirang, yogya tiniwakan danda gung artha manut pararem;
- (6) Sang sapisira ugi kacuntakan, saluiring cuntaka, yan durung mabersih, tan kalugra ngaranjing ka pura kahyangan. Yan katenger wenten mamurug, yogya katiwakin danda marisudha kahyangan punika;
- (7) Sedahan ngengengan miwah sapanunggilan ipun tan kalugra maseha ring pura. Yan wenten mamurug, yogya danda gung artha manut pararem;
- (8) Tan kalugra ngawentenang klecan, jajuden, sajeroning suter utawi panyengker pura kahyangan. Yan wenten mamurug, sang ngalaksanayang katur ring Sang Amawarat, tur klecan utawi jajuden punika kawangdeang;
- (9) Tan kalugra makta saluiring sane kasinangguh tan suci ka jeroning suter utawi panyengker pura kahyangan. Yan wenten mamurug, yogya sang mamurug marisudha pura punika;
- (10) Sang sapisira ugi rikalaning makemit ring pura kahyangan, merem, tan kalugra madukan lanang istri, sajaba anak sane kapineh kari alit. Yan mamurug, keni danda manut pararem;
- (11) Ring jeroan pura kahyangan tan wenang kanggen sajaba ngalaksanayang upakara upacara yadnya. Yan mamurug keni pamidanda manut pararem;
- (12) Sang sapisira ugi, katedunan utawi kapangluh sajeroning pura kahyangan sawawengkon Desa Adat Batugunung, mababaos minangkenang pangandikan Ida Ratu Susuhunan utawi Bhatara, ring gelis tunasang tirtha laluputan mangda gelis udep. Prade sasampun

kaketisin tirtha, kantun ngatemel masera-masero, ngawetuang sumandea kayun pamaksane, irika patut pintonin, ambilang toya apane, celebang limannyane makakalih. Yan mabukti tan belus, nyandang gega pangandikan Bhatara. Yan prade belus, tan nyandang gega, gelisang gingsirang mangda doh saking pura punika.

Kaping 4

Indik Pamangku

Pawos 30

- (1) Ring soang-soang Pura Kahyangan ugi madue pamangku.
- (2) Sane tan wenang kaadegang dados pamangku luire :
 - ha. Cedangga luire : peceng, perot, cungh lan sapanunggilan ipun;
 - na. Mabukti sungkan rahat;
 - ca. Mabukti nahen ngarug sasana, minakadi malaksana corah.
- (3) Pidabdab ngadegang pamangku inggih punika, sangkaning kajujuh saha sampun kabriyukin krama desa, yan lintangan ring adiri panyudian malarapan antuk lekesan;
- (4) Sang sapasira ugi pinaka jan banggul, Pamangku ring Pura Kahyangan Tiga, Pura Kahyangan Jagat sane wenten ring sajeroning desa, mangda pageh ngamel kalih ngalaksanayang sasanan pamangku;
- (5) Sang sapasira ugikrama desa sane kaadegang pamangku, yan kari alaki rabi yogya lanang istri mawinten;
- (6) Sang kasudi pacang kanggen pamangku, patut mawinten ring pura genahe dados pamangku, Mungguing prabea kasandangin antuk krama pura soang-soang, Pamangku Desa kalih Pamangku Kahyangan Jagat kasandangin antuk Krama Desa;
- (7) Pamangku patut madue amongan pura soang-soang, yan tan madue amongan pura, prasida tan kalugra ngantebang babanten ring pura-pura saluire;
- (8) Yan wenten Pamangku katekan pati, yogya tiniwaken. Patut polih patulung prabea atiwa-tiwa, yan Pamangku Desa kalih Pamangku Kahyangan Jagat polih patulung saking desa, yan pamangku siosan, saking krama pura soang-soang, agung alit patulunge nganutin pamutus babaos sajeroning pararem kala punika;
- (9) Yan pamangku wus tiniwaken, patut kakaryanang pangelad wiadin pamegat antuk krama desa utawi krama pura inucap. Yan pamangku punika kari rajeg ngamong swadharmaning pamangku kantos hantaka;
- (10) Tuas-tuasan Pamangku mungguh sajeroning gagaduhan, Pararem Desa ring pura soang-soang, taler nganutin dresta;
- (11) Pamangku kagentosin majalaran antuk :
 - ha. Seda;
 - na. Mapinunas mararian, saking patut pinunase, nanging tan kantun ngalaksanayang dharmaning pamangku, kawekas kalaning seda tan polih patulung prabea atiwa-tiwa;

- ca. Saking patut pinunase, majalaran antuk lingsir, sampun tan mampuh, sungkan rahat tan kengin waras, kajadayang antuk krama pura, wiadin desa. Kawekas kalaning seda, patut polih patulung prabea patiwa-tiwan;
- ra. Sangkaning kausanang, majalaran antuk laksana mamurug sasanan pamangku. Kawekas kalaning seda tan polih patulung prabea atiwa-tiwa.

Kaping 5

Indik Cuntaka, miwah Sosot

Pawos 31

- (1) Sang sapasira ugikrama desa sane kahanan cuntaka, tan wenang ngaranjing ka pura kahyangan, ka panyucian kalaning nyuci gening, minakadi genah saluiring genah sane kinucap suci pingit;
- (2) Tan wenang ngaryanin saji saluiring saji sane pacang katur ka Sanggar Tawang, sakadi suci gening. Sajawaning banten sane pacang katur ka Prajapati, dalem panguluning setra;
- (3) Luir sane kinucap cuntaka :
 - ha. Anak istri kalaning ngrajasuala, suen cuntakane, saking ngawit ngrajasuala, kantos nyat, macihna sampun malukat;
 - na. Sang alakirabi, suene cuntaka, ngawit saking rahina pangantenane, wiadin rahina marangkate, kantos puput mabiakaon;
 - ca. Rama rena cuntaka sangkaning ngembasang oka. sane lanang cuntaka, suene saking embas anake alit, kantos kepus odel nyane saha masasuuk, raris malukat. sane istri pinaka rena, cuntaka 42 (petang dasa kalih) dina saking wau embas rarene;
 - ra. Yan anak istri cuntaka sangkaning karuron, pateh ring cuntaka ngembasang oka, lanange cuntaka tigang rahina, saha sampun malukat.
- (4) Cuntaka malarapan antuk kasedaan, kapatian :
 - ha. Yan wenten anak alit durung kepus odel raris seda, rama rarene cuntaka, sane lanang 3 (tigang) dina, sane istri 42 (petang dasa kalih) dina;
 - na. Yan sang ngarepin, minakadi sang magenah sajeroning karang pomahan sang seda, suen cuntakane, saking wau seda kantos puput panglemek karyane, punapike mapendem, luh yan atiwa-tiwa. Macihnyang punah cuntakane antuk marerebu, malukat;
 - ca. Sang polih ninjo, ngarap sawa, ngamel saha ngarembat saeteh-eteh pula-palining sawa, nyembah sawa, mangan paridan sawa, punika taler kabaos cuntaka, punah cuntakane macihnaang antuk malukat;
 - ra. Rikalaning desa ngamargiang upacara yadnya, pet prade wenten sinalih tunggil krama kalayu sekaran, patut kamargiang sebel karang ngawit saking negdegang karya kantos masineb. Wawanengan sebel karang amung ring sang magenah

sajeroning karang sane kacuntakan. Yan pacang ngamargiang sebel karang, patut mendem makingsan kalaning wengi, tan polih panyanggran desa, sajaba sang tan kapatut dados pendem, punika maraksa sajeroning karang pomahan.

- (5) Anak wetu saking semara dudu utawi tan pawidhi widhana pawiwahan punika taler cuntaka. Suene cuntaka, salamine durung kaupacarain, wiadin nuduk ngangkenin pianak, utawi nganggen dadaman;
- (6) Cuntaka sane mabukti madue panyungkan sane tan sida waras, minakadi sungkan hila, buduh, ngawijilang reged saking silit, bhaga, purus, tan henap mameres, berung borok tahunan mabanyeh, miwah saluir punika. Suene cuntaka, salami durung waras;
- (7) Cuntaka sangkaning cedangga manut panglokikan Prajuru Desa punika tan kawenang napak palemahan panyucian genah nyuci gening;
- (8) Yan wenten sinalih tunggil sang cuntaka antuk ngaraksa sawa wiadin layon, mamamah utawi mapakayun ngarauhin karya ayu atma wedana, minakadi mabhakti ring sang wenang bhaktinin, dados, nanging tan wenang ngarap, ngarembat, nyuun, ngamel saupakaraning puspa lingga;
- (9) Yan wenten sinalih tunggil krama desa durung tutug cuntaka kadi ucaping arep, mamurug larangan, yan wenten ngatengahang ka desa, Prajuru Desa niwakang pamidanda, yogya sang mamurug marisudha sakabuatan manut panglokika;
- (10) Yan wenten sinalih tunggil anak istri, sangkaning tan meha ngrajasuala sasampun ring pura, wiadin ring genah larangan siosan, raris kacirenan, wenang ya tiwakin danda tan meha, yogya marisudha genah punika, katulung antuk pamaksan pura wiadin pangemonge soang;
- (11) Yan wenten sinalih tunggil krama desa, kacuntakan antuk ngaraksa sawa wiadin layon, napkala pagilih pagantosan babanjaran ngaci-aci ring sinalih tunggil kahyangan Desa, pacaruan ring desa, sadurung tutug sengker cuntakania, wenang tan tedun mayahan, tan dinosan, yan wenten pasadok sang cuntaka ring Prajuru Desa;
- (12) Yan cuntaka gamia gamana lan nyolong smara Prajuru Desa nantosang pamutus Sang Amawarat. Yan sampun wenten pamutus saking Sang Amawarat ring Desa katiwakan pamidanda manut pararem;
- (13) Cuntaka sangkaning mabukti salah timpal, cuntaka ragan sang malaksana, miwah desa pagenahania. Tutug cuntakania yan sampun sang malaksana mrayascita panyangaskara raga, genah malaksana lan merayascita desa. Buron sane kaajak masanggama kararung;
- (14) Anak luh beling tan kapariangken antuk lanange, suene cuntaka kantos wenten pangupakara panyangaskara kulawisudha, anake beling mawidhi widana pawiwahan masanding keris pinaka linggan sang kadalih.

Pawos 32**(1) Indik Sosot :**

- ha. Sapasira ugi pacang naur sosot wiadin punagi, patut nganggen pamegat sot rikalaning dina piodalan Bhatara, ngadasa dinaang aci, patut masadok ring pamangku pura, yan ring kahyangan desa panaurane masadok ring pamangku pura desa minakadi Prajuru Desa. Panauran punagi punika, wau kalaksanaang yan sampun puput pangodale;
- na. Sapasira ugi naur sasangi pacang ngaturang pangodal, ugi mangda ring dina pagantosan piodalane. Sang naur punagi, wenang nunas kanti patulung karya ring krama utawi pangempon kahyangan. Sang naur sasangi nyukserahang daging cumek saprabeaning pangodal ka desa;
- ca. Sapasira ugi naur sasangi maturan suaran tangguran saluiring tatabuhan, sasolahan, minakadi saluir ipun, Mungguing prabea punika sami kaangganin antuk sang masasangi;
- ra. Panauran punagi ring Pura Kahyangan Jagat, sane wenten ring desa, manut dresta.

(2) Aturan :

Sang sapasira ugi ngaturang dana punia, punika sami patut kaunadikayang antuk Prajuru Desa, Kelihang Pamaksan Pura soang-soang, mangda kasidan mapuara ayu. Aturan punika kaungguhang sajeroning lekita;

(3) Sasarin Canang :

Sasampun puput pangaci-aci puja waline, sasarin canang punika kapupulang saha kawilangin. Kaunadikayang antuk Pamangku, Prajuru Desa lan Prajuru Pura, indik tatiwak lan pamargin ipun, sangkaning jati nirmala.

Palet 2**Indik Resi Yadnya****Pawos 33**

- (1) Krama desa, yogya ngawerdiang kapradnyanan, kautamaan Sang Hyang Aji Sastra, asewaka nunas pawarah ring sang maraga widagha pradnyan, pingajeng ring sang kasinangguh guru loka;
- (2) Prajuru Desa, Kelihang Banjar, ngutsahayang kawerdian kamuruban kautamaan Sang Hyang Aji Sastra, ngawentenang paruman, parembugan, pinaka genah krama desa mamanguhang pawarah-warah ayu;
- (3) Kalaning dewasaayu, wenangdesa matirtha yatra, wenang desa ngaturang punia miwah resi bhojana ring Ida Sulinggih. Taler kalaning karya utama ring desa, saluiring karya sane kaputus antuk Ida Sulinggih patut ngaturang punia. Asapunika taler ring sang mapitulung patut maweh dana;
- (4) Sang sapasira ugikrama desa yan mapakayun pacang mapodgala, taler mangda wenten pasadok ring Prajuru Desa, sajaba patut polih palugrahan saking Sang Amawarat;

- (5) Prajuru Desa, mamatut pisan, yan krama desa ne mapunia ring sang pradnyan, ring sang widagdha, ring sang satata ngarajegang dharma, pingajeng ring Ida Sulinggih pasuryan nyane soang-soang.

Palet 3**Indik Pitra Yadnya****Pawos 34**

- (1) Pamargi ngupakara sawa, ugi manut sastra Agama Hindu. Wenten makudang-kudang soroh, sakadi ring sor puniki :
- ha. Mapendem ring prathiwi;
 - na. Makingsan ring ghni;
 - ca. Atiwa-tiwa, palebon, utawi ngaben;
 - ra. Yan rare durung makupak untu wus kepus odel hantaka, wenang ngangge pangentas bangbang masadhana klungah kelapa gading, ngaran ngalungah, tan wenang kaabenang;
 - ka. Yan rare durung kepus odel hantaka, pamali ngaran, pendem juga tan hana pangupakarania kewala ganten utawi adem paican Ida Sulinggih;
- (2) Sang sapasira ugi krama desa, tan kawasa makta sawaka desa, yan sawa ika sampun keni pangupakara sawa. Yan wenten mamurug, yoga katiwakan danda, merayascita marisudha Desa;
- (3) Saluiring upacara atiwa-tiwa, palebon, utawi ngaben, yan ngeseng ring setra ugi kawenangania, tan wenang ring desa. Yan wenten mamurug, wenang danda marisudha desa. Krama desa sang atatulung, danda artha manut pararem;
- (4) Yan wenten krama desa nyekeh sawa, macamana, mabersih, tan kalugra lintangan ring 42 (petan dasa kalih) dina ngawit saking dina sedane. Yoga murnama, tilem miwah saluir upacara rarahinan. Yan kalaning angurung sawa, sajeroning desa kawangunan karya agung kantos nyuci gening, luire matabuh gentuh, Bhatara turun kabeh, karya agung ring Basakih, yoga tumpang salune tedunang saking balene, genahang ring natah umahe, saking bhatara kodhal kantos Ida masineb;
- (5) Tan wenang nyekeh sawa yan tan macamana, mabersih, lintangan ring 12 (roras) dina, ngawit saking dinane seda. Yan wenten mamurug, danda gung artha manut prarem;
- (6) Sang sapasira ugikrama desa tan wenang atiwa-tiwa, ri kala pangaci-acin desa, luire : patirthan, patoyan ring Pura Kahyangan Jagat, Pura Puseh, Pura Dalem, Pura Desa, Bhatara Turun Kabeh, Tabuh Gentuh, minakadi karya agung siosan :
- ha. Yan patirtaan ring Pura Puseh, Pura Desa. Pura Dalem, miwah Prajapati, pura kahyangan jagat saking 11 (nyolas) dinaang aci-aci kantos Bhatara puput masineb;
 - na. Yan karya Matabuh Gentuh, Bhatara Turun Kabeh, minakadi saluiring karya sane nyuci gening, saking ngawit nyuci kantos Bhatara puput masineb;

- Kalaning Bhatara ring Pucak Lempuyang katuran turun kabeh ka Besakih, saking 3 (nigang) dina Bhatara lunga, kantos Ida Bhatara mawali saha sampun rauh ring Pura Lempuyang patut ngaturang tatingkeb ring Sagara Ujung raris masineb;
- (7) Yan wenten mamurug kadi inucap ring ajeng, danda merayascita desa, minakadi krama desa sane matulung danda gung artha manut pararem;
 - (8) Yan wenten kramadesa mendem sawa kalaning dina larangan, kawasa, nanging ugi masawen, durung magagumuk, laku kingsan ngaran sasampun polih lugraha saking Prajuru Desa;
 - (9) Yan makingsan ring ghni, sawa gineseng, hasti hinanyut, manut dresta. Yogya nganggen tirtha pabersihan. Mungguing dewasa, sa sor ipun dewa sane dados marginin mendem sawa;
 - (10) Tan kalugra nginepang miwah ngawangdeang bangbang ring setra, yan wenten mamurug danda merayascita setra;
 - (11) Padewasan :
 - ha. Padewasan mendem ring perthiwi miwah makingsan ring gni, wenang katiwakang antuk Bandesa;
 - na. Padewasan atiwa-tiwa, katiwakang antuk sulinggih sane pacang muput, yogya sampun kapatut antuk Bandesa;
 - ca. Indik larangan ngupakara sawa, sajaba ngunggahang ka tumpang salu, sane kamanggehang sajeroning desa, luire : kala gotongan, semut sadulur, ingkel wong, lan pasah. Yan wenten mamurug, kapidanda manut pararem;
 - ra. Tan wenang ngagah ngulung, teges ipun, sajeroning setra tunggil, tan dados mersihin sawa, nuju dina pangutangan yan ring setra punika wenten ngalaksanayang pangabenan. Yan wenten mamurug kapidanda manut pararem;
 - ka. Yan pacang mendem sawa, tan kalugra ngunjalin yan genah sawa punika dados akarang pomahan, yan mamurug, kapidanda manut pararem;
 - da. Yan pacang ngamargiang upacara atiwa-tiwa dadakan dados kamargiang sajeroning 12 rahina, sajawaning wenten larangan desa;
 - (12) Tan dados nguuk utawi ngebet sawa sadina-dina, teges ipun, sajeroning setra tunggil, yan wenten ngaben lintangan ring adiri, nyawa prateka, nyawa pranawa, sang pacang nyawa pranawa patut nguuk sawa sinarengan ring sang pacang merteka mabersih ring setra, yan wenten mamurug kapidanda manut pararem;
 - (13) Tan kalugra ngaben, sadurung puput panglemek, masasapuh ring setra sang makarya ngaben rihinan, yan wenten mamurug kapidanda manut pararem;
 - (14) Yan wentensawa tan kapariangken ring desa, hingaranan bedagan desa, ugi kasukserahang majeng ring Sang Amawarat;
 - (15) Yan sawa sangkaning salah pati, angulah pati, desa tan ngalarangin, yan sawa punika tiniwaken pramangkin. Sara ledang sang madue, minakadi Ida Sang Sulinggih sane pacang muput;

- (16) Yan wenten sinalih tunggil sawa, genahe seda wiadin padem, sajabaning karang pomahan, luire : ring tegal, pura, pasar, banjar, sekolah, minakadi genah siosan dudu karang pomahan, yogya sang madue wirange merayascita marisudha genah punika. Yan sawa tan kaparihangkenan, genah punika patut kaparisudha kaprayascita antuk sang madue emponan;

Pawos 35

Indik angkatma wedana :

- ha. Sang sapasira ugikrama desa, yan kalaning angkatma wedhana, luire : ngaroras, patileman, baligia, tan wenang ngawangunang payadnyan, petak, ring palemahan pura Kahyangan Desa, minakadi kahyangan siosan;
- na. Sang sapasira ugi wus ngawangun karya angkatma wedhana, yogya karang payadnyan ika kapralina, sakasepipun 42 (petang dasa kalih) dina saking dina karyane

Palet 4

Indik ManusaYadnya

Pawos 36

- (1) Sang sapasira ugikrama desa, tan wenang ngawangunang saluiring upacara manusa yadnya ring wawidangan palemahan Kahyangan Desa. Yan mamurug, wenang kapidanda manut pararem;
- (2) Sane dados kamargiang sajeroning palemahan pura, wantah ngamargiang upacara pawintenan manut dresta.

Palet 5

Indik Bhuta Yadnya

Pawos 37

- (1) Sajeroning Desa Adat Batugunung, pacaruan manut ungguan, miwah sor singgih, luire :
- ha. Pacaruan Desa sadakala :
- 1) Manca satha ngamasa-masa, kala Tileming Kasanga, magenah ring pempatan agung, kaemponin antuk krama desa;
 - 2) Tabuh Gentuh, manut sakabuatan, sakasidan.
- na. Pacaruan Desa padgatakala : rikala jagate kabrebehan, kageringan, kadurmanggalan, katiben panca-baya, miwah sane siosan sane patut carunin;
- ca. Agung alit caru, manut ungguan macaru, babuatan pacaruan, kalih nista madhya, utama manut gagaduhan pura inucap.
- (2) Pacaruan ring pura-pura Kahyangan, Pamerajan, Dadia saluire, manut dresta minakadi gagaduhan pura inucap;
- (3) Pacaruan kalaning Tilem Kasanga, ring karang pomahan soang-soang manut sastra dresta, saha kalanturang antuk brata panyepian.

PANCAMAS SARGAH
SUKERTHA TATA PALEMAHAN

Palet 1

Indik Tegal, Bangket lan Karang

Pawos 38

- (1) Palemahan Desa, mauger antuk tri mandhala, luire :
 - ha. Utama mandhala : palemahan sane kaangge ngenah pura, wiadin parahyangan;
 - na. Madhya mandhala : palemahan sane kaanggen, genah wawangunan, sakadi : banjar, kantor, miwah sane siosan;
 - ca. Nista mandhala : palemahan sane kaanggen setra, margi, rurung, tlabah, papunduk, telajakan karang, genah ngingsanang wahana, miwah sane siosan. Sahanan palemahan sane wenten ring wawengkon desa, yogya mangda madue babaledan wiadin wates sane pasti.
- (2) Sahanan palemahan punika, ugi mangda madue margi, rurung, papunduk sane dados kaentasin;
- (3) sang sapasiraugi pacang mapawangun pakarangan, pomahan, pura miwah sane siosan, patut ngutsahayang mangda madue margi;
- (4) Yan wenten pakarangan pura, pomahan, tegal, miwah palemahan siosan kabebeng tan madue margi, rurung, miwah papunduk, sang madue patut ngatengahang babaose ka desa, Prajuru Desa yogya negdeg, ngutsahayang mangda polih margi malarapan sami suka;
- (5) Yan desa pacang ngalinggahang margi, rurung, minakadi makarya margi, rurung desa, saking sampun ingkup Pararem Desa kalih sang madue tanahe, yan nganggen tegal, miwah palemahan siosan, wenang ngamargiang sasempalan antuk desa tan naur pangangan tanah punika. Nanging yan madaging tatanduran, papayon, wawangunan saluire, desa patut ngicen prabe^a agung alit manut pararem;
- (6) Sahananing karang pomahan ugi mangda masengker. Pidabdab nyengker, magaleng kadulu. Panyengker sane sisi kangin miwah kaler, patut kakaryanin antuk sang ngenahin karang punika, sajaba karang ngele wiadin lingkehin rurung, palemahan suung;
- (7) Sang sapasiraugi ngenahin karang tegehan, patutnaku, tegehe asukat tanah dangsah, sane tebenan, wenang nyusunin;
- (8) Telajakan karang patut kapiara antuk sang ngenahin karang punika soang-soang, mangda mapikenoh tur asri;
- (9) Yan wenten sinalih tunggil nyadia naleksek babaledan saluring babaledan wiadin wawatesan, yogya katiwakan danda manut werat ringan kaiwangane, saha maayu sane kasleksek, kalih mrayascita sakabuatan, sane nyandang katibanan panyangaskara, indik degdeg wawatesan utawi babaledan manut dresta kuna;

- (10) Yan wenten sinalih tunggil ngaletihin, ngarucakin, ngarobedin, ngararabin, miwah saluir ipun, nyorongang babanon, yogya katiwakan danda gung artha manut pararem, tur maayu sane kaletihan, karucakin, karobedan, raraban inucap ring ajeng, saha mrayascita sane nyandang keni panyangaskara;
- (11) Yan wenten anak ngenahin palemahan sajeroning wawengkon desa tan tinut makrama desa nganutin Awig-Awig miwah Pararem Desa, tan kalugra nganggen saluiring paduean desa, tan kalugra ngalaksanayang Panca Yadnya sajeroning Desa;
- (12) Sapasira ugi ngenahin palemahan sajeroning desa patut nganutin Awig-Awig miwah Pararem Desa;
- (13) Sang sapisiraugi sane pacang ngadol, ngantahang, maselangang, majegang, masewaang, makedihang palemahan tegal, palasan miwah sane siosan sane magenah sajeroning wawidangan desa, ugi mangda polih panugrahan saking Prajuru Desa malarapan Paruman Desa;
- (14) Sang sapisira ugi pacang migunaang palemahan tegal, carik, pakarangan, sajaba pacang genah matatanduran, genah pomahan, yogya sangkaning palugrahan Prajuru Desa, siosan ring palugrahan Sang Amawarat. Yan wenten mamurug sasampun polih kasambatsara antuk desa, sang mamurug katiwakin danda manut pararem.

Palet 2

Indik Kakayonan

Pawos 39

- (1) Yan wenten wit-witan wiadin kakayonan ngungkulin palemahan anak sios, sane ngawinang tieb, tampias, ngarobedin, asing kungkulan wenang ngatengahang ka desa, Prajuru Desa maritetes saha mituduhang sang madrewe mangda ngrancap, nebtob, wiadin ngarebah. Yan kantos ping 3 (tiga) pituduh desa ne tan kalingu, wenang katiwakan danda sang anikel tuduh, gung artha manut pararem. Kakayonan punika prasida karebah antuk desa picundangan;
- (2) Tanem tuwuh utawi tatanduran siosan sajeroning karang paumahan, tan kalugra tegal ipun lintangan ring jan palit 11 (solas), utawi 5 (limang) meter, bungkil ipun adepa agung, utawi kalih meter tengah saking panyengkere ngajeroang. Yan mamurug, wenten raris ngatengahang ka desa, yogya sang mamurug katiwakan danda gung artha manut pararem, saha ngarebah, sajeroning 3 (tigang) rahina saking pamuput babaose;
- (3) Kakayonan sajeroning paumahan ugi mapiara mangda tan ngaletihin, ngarobedin, mamayen karang siosan, saking akah kantos daun ipun. Yan wenten mamurug, tan tulinga ring kakayonan due, wenten ngatengahang ka desa, Prajuru Desa yogya maritetes, saha nepasin manut panglokika kalih Pararem Desa;
- (4) Yan wenten wit taru mentik kantos ageng ring babaledan wates, saluiring babaledan muang wates, wenten ngatengahang ka desa, patut taru punika karebah, raris pinara tiga, apahtigayan mantuk ka desa, apahtigayan sang madue babaledan soang-soang;

- (5) Yan wenten sinalih tunggil nundungin tanem tuwuh, kakayonan, sane kaswatah pacang mamayen, wenang kabaosang ring sang madue. Yan akas sang madue, yogya katengahang ka desa. Prajuru Desa negdeg tanem tuwuh wiadin kakayonan punika. Yan manut panglokikan Prajuru Desa yogya tundungin, taler akas sang madue patut sepat gantungin. Yan jati kadi panyuatahe, yogya sajeroning 3 (tigang) dina, karebah picundangan. Sang madue katiwakan danda gung artha manut pararem, dosane anikel tuduh. Yan tan yukti kadi panyuantahe, sang ngatengahang katiwakan danda gung artha manut pararem, dosane angadakaken nora, tanem tuwuh wiadin kakayonan punika tan karebah;
- (6) Yen wenten sinalih tunggil nyadia nandur saluiring tanem tuwuh wiadin kakayonan sane pacang dados ageng, nesek ring babaledan, ring wates, papunduk, ugi mangda masupeksa ring Prajuru Desa, kalih ring panyandinge soang-soang. Yan tan kalugra tan kapisukaang, pradene taler kapurug, yogya sang mamurug katiwakan danda gung artha manut pararem, tur ngamademang tatandurane;
- (7) Sang sapisira ugi nyakap tegal, nandur tatanduran tanem tuwuh sane ngawinang tanahe andog ring tegal sasakapan, ugi mangda makarya pasobaya ring sang madue tegal inucap. Yan durung pinganan mapikolih tatanduran punika, sadurung mapikolih sasoripun 5 (limang) pelabuh, sajaba sangkaning kaiwangan panyakap raris kajabutin, yogya sang madue tegal naur panjala sawit-sawit, gung artha manut pararem;
- (8) Sang sapisira ugi nyakap tegal, tan kawasa ngarebah tatanduran tanem tuwuh, yan tan polih lugra saking sang madue tegal punika;
- (9) Yan wenten wit-witan rebah antuk kapancabaya tan dados kajarahan antuk sang sapisira ugi, yan wenten mamurug keni pamidanda manut panglokika;
- (10) Yan wenten wit-witan kateteb miwah karebah, raris niben wawangunan utawi tatanduran anak sios, prade katengahang ka desa wenang prajuru mamaosin tur niwakang pamutus manut pararem;
- (11) Tan dados marereh-rerehan saluire ring palemahan utawi sasakapan tan due, yan tan kapisukayang, yan wenten mamurug, wenten raris ngatengahang ka desa, keni pamidanda manut pararem.

Palet 3

Indik Wawangunan

Pawos 40

- (1) Sang sapisira ugi krama desa yan pacang ngawangun panyengker karang pomahan ring sawawengkon desa, patut masupeksa ring panyandinge. Yan tan radin yogya nunas degdegan ring Prajuru Desa. Prajuru Desa ne gdeg saduajeng ring sang mawicara;
- (2) Wawangunan ring palemahan pecak tegal, palemahan suung, sane sampun masanggah paon, palemahan punika prasida kabaos karang pomahan, duaning sampun katiwakan pangupakaran karang, patut madue rurung betel ka margi agung, sukat dados pacang

- ngalintangang papaga, duaning tan kapatut ngalintangang sawa ring tegal utawi bangket. Yan wenten mamurug, yogya Prajuru Desa niwakang tatepasan mangda sang mamurug merayascita palemahan inucap;
- (3) Yan tan masanggah panguluning karang, kabaos akakubon. Tan yogya genah ngaraksa sawa. Yan wenten mamurug, yogya katiwakan pamidanda mangda merayascita palemahan punika;
 - (4) Sapasira ugi pacang ngawangun wawangunan genah ngalaksanayang upacara Agama luire : Pura, Masjid, Gereja, Wihara, miwah sane siosan, ugi mangda wenten lekita palugrahan Prajuru Desa, kalih lekita palugrahan Sang Amawarat. Yan wenten mamurug kadi kinucap ring ajeng, kabaos tan sidakarya, tan wenang anggen, tur wawangunan punika yogya wangdeyang;
 - (5) Wawangunan sajeroning karang pomahan, ugi nganutin Tri-mandhala : Utama mandhala, inggih punika sanggar panguluning karang; Madhya mandhala, inggih punika pagenahan mapumahan; nista mandhala, inggih punika ngaran lebu;
 - (6) Tan wenang ngungkulng capcapan wawangunan ka jeroning karang pomahan siosan tandue. Yan wenten mamurug, wenten ngatengahang ka desa, yogya Prajuru Desa degdeg, saha nyipat gantungin. Yan jati lintang sajeroning 25 (selahe) rahina saking puput babaose mangda sampun kapastika;
 - (7) Tan wenang nganggen tembok umah wiadin tembok panyengker tandue. Wenang ya kasambatsara antuk sang madue. Yan akas tur mamurug sang kasambatsara, yogya katengahang ka desa, tur kabaosan antuk Prajuru Desa tur niwakang pamutus manut pararem;
 - (8) Sang sapasira pacang mapawangun nepi ring margi ageng, nepi ring rurung desa, yogya mangda wenten lekita palugrahan saking Prajuru Desa, wiadin lekita palugrahan Sang Amawarat. Yan tan polih lekita palugrahan, ritatkala wawangunan punika katundungan tan polih prabea katundungan;
 - (9) Sang sapasira ugi ngawengku karang pomahan, yogya urati miara kaasrian lebu pakarangania, rurung pentasan pinih sor asukat karangnia ngalajur;
 - (10) Sang sapasira ugi ngawangun utawi migunayang Palemahan Desa, ugi polih palugrahan saking Prajuru Desa lan Sang Amawarat.

Palet 4

Indik Wawalungan

Pawos 41

- (1) Sane kinucap wawalungan, sakancan buron suku pat sane nyadia kapiara, sakadi : bawi, banteng, kambing, kebo, misa, jaran, miwah sapanunggilan ipun; taler watek makampid sane nyadia kapiara, sakadi: ayam, itik, angsa, dolong, miwah sabacakan ipun;
- (2) Sang sapasira ugi krama desa sane miara wawalungan suku pat, tan wenang ngalubar, mangda tan ngarucakin, ngaletihin palemahan tan due, miwah mamayen krama desa,

- jana pada. Yening mamayen keni pamidhanda manut pararem;
- (3) Sang sapisira ugi krama desa sane miara watek suku kalih, watek makampid, yatnain ugi mangda tan banget ngarucakin, ngaletihin, palemahan pomahan, tatanduran duen anak siosan;
 - (4) Tan wenang ngangonang, negulang, ingon-ingonring palemahan tan due, minakadi tan sasakapan due, yan tan kapisukayang antuk sang madue. Sang madue palemahan, Prajuru Desa, Pacalang Desa, Kelihang-Kelihang asing mamanggihin, wenang nyambatsara sang madue wawalungan ika. Yan akas sang kasambatsara, wawalungan punika wenang taban, Prajuru Desa yogya niwakang pamidanda manut lokika, gung artha manut pararem;
 - (5) Yan itik, angsa, dolong miwah sapanunggilan ipun, ngarucakin tatanduran, taler wenang taban. Indike naban mangda masaksi, saha kasupeksayang ka desa pramangkin, Prajuru Desa yogya mamaosin, niwakang pamidanda manut panglokika;
 - (6) Yan wenten wawalungan ngeleb, mamegat ngaranjingin palemahan pura, kahyangan, setra, karang pomahan, miwah sane siosan lokikanen juga, yan tan nyadia kalebang tan wenang taban, tur katengahang ka desa;
 - (7) Sang sapisira ugi ngarereh ulam ring tukade, miwah saungguaning ulam sajeroning Desa Adat Batugunung, tan wenang nganggen tuba miwah listrik saluir ipun. Yan wenten mamurug wenang katiwakan danda gung artha manut pararem;
 - (8) Sang sapisira ugi tan kalugra ngamademang utawi morosin luire : manuk, paksi, bojog, petu, luwak, kijang miwah sabacakan ipun, yan tan ngarucakin tatanduran, yan wenten mamurug wenang katengahang ka desa pramangkin, kabaosin antuk Prajuru Desa saha katiwakin danda manut panglokika, kalih Pararem Desa;
 - (9) Sang sapisira ugikrama desa ngawangunang kandang wawalungan buat adol atuku, yan kandang ayam, itik, miwah sapanunggilan ipun, buat naluhang, miwah adol atuku, dagingan seket ukud. Yan kandang wawalungan suku pat, buat dagingan 5 (limang) ukud, punika dados sajeroning karang pomahan. Yan lintangan ring punika daging kandang, tan dados wangunang jeroning karang pomahan, yogya kawangunang ring palemahan sane mawaneng sator ipun 100 (satus) depa saking palemahan karang pomahan, sekolah, kantor, pura kahyangan, minakadi genah sane kakeker wiadin kapingitang antuk desa. Tur mangde madue lekita palugrahan saking Prajuru Desa lan Sang Amawarat.

SAT SARGGAH
SUKERTA TATA PAWONGAN

Palet 1

Indik Rangkat

Pawos 42

- (1) Indik rangkat punika, manut desa kala patra, muang sima dresta, sane kapatutang tur katinutin antuk krama desa soang-soang, tan singsal ring uger-uger panagara luire :
 - ha. Papadikan;
 - na. Ngarorod;
 - ca. Ngunggahin;
 - ra. Narimen utawi katrimenan.
- (2) Indik rangkat punika yan sampun mawidhi widhana pawiwahan, sanistania mabiakaon tur malukat, rangkat punika kasinanggih puput parikrama;
- (3) Yan wenten anak istri krama desa, karangkatang antuk sang sapisira ugi, yan kantos arahina ring awengi saking dina matinggale saking jumah ipun tan wenten pajati, yogya sang madue wirange nunas kanti ring Prajuru Desa mangda ngamargiang saserepan. Yan sampun sinah genahnia, ngararis ngamarggiang panegdeg, saha nunas kanti ring Sang Amawarat;
- (4) Sang sapisira ugi krama desa, yan karauhan Tamiu praya masinutan malarapan antuk ngarorod, ugi mangda masadok miuningang ring Prajuru Desa. Prajuru Desa yogya maritetes, yan sangkaning tan patut pamargin rangkatnia, Prajuru Desa nguduhang mangda katur ring Sang Amawarat. Yan wenten krama desa mamurug, yogya sang mamurug kené pamidanda manut pararem, tur tamiu punika katundung saking desa;
- (5) Yan wenten krama desa, ngamet anak istri pinaka rabi tan manut sima dresta minakadi sastra agama, yogya katur ring Sang Amawarat mangda kabaosan saha polih pamutus;
- (6) Yan wenten saking liwaring desa pacang muput rangkat ka wawengkon desa, sang madue wirang luh, yogya nunas pasaksi ring Prajuru Desa, sinalih tunggil mangda wenten ngarauhin, tur anake istri sane marangkat ngarorod patut ngaturang pangeling-eling ka desa manut pararem;
- (7) Yan wenten krama desa ngarangkatang anak istri sios ring magama Hindu, pawidhi widana pawiwahannia patut kalaksanaang sasampun anak istri punika masudi wadhani.

Ngarug sasana

Pawos 43

- (1) Sapisira ugi krama desa mobotin anak istri sane sami-sami durung madue rabi, tur sabda kapariangken, yan katur bebaose ka desa, Prajuru desa patut ngutsahaang sang kalih mangda majangkepan alaki rabi, tur mawidhi-widhana pawiwahan manut dresta;
- (2) Sapisira ugi krama desa mobotin anak istri, sampun madue rabi, wirangnya patut ngaturang wicara punika ring Sang Amawarat. Yan sampun wenten pamutus saking Sang Amawarat, desa wenang niwakang pamidanda pawuwuh manut pararem.

Palet 2**Indik Palas Makurenan utawi Nyapian****Pawos 44**

- (1) Sane kabaos nyapian inggih punika, palas makurenan, sane sampun katiwakan pamutus antuk Sang Amawarat, minakadi sampun kakrabang ring Sangkepan Desa;
- (2) Yan wenten krama desa ngarangkatang sapian, sadurung tigang sasih utawi 105 (satus lima) dina, saking dina palase, yogya sang ngarangkatang sapian punika keni danda pakerang manut pararem;
- (3) Krama desa sane nyapian, sasampun polih pamutus saking Sang Amawarat patut masadok miuningang ring Prajuru Desa, sakasep ipun asasih saking palase;
- (4) Yan wenten anak istri wit saking wawengkon Desa Adat Batugunung, nyapian mawali ka desania, yogya sang madue wirange merayascita marisudha anake luh punika saha kaupasaksi antuk Prajuru Desa.

Palet 3**Indik Balu****Pawos 45**

- (1) Sane kabaos balu inggih punika anak istri utawi anak lanang sane katinggal seda antuk rabine, wiadin anak lanang katinggal nyapian, kawastanin balu;
- (2) Yan wenten anak istri balu kandugi marangkat yogya rangkat punika kapuputang antuk wirang lakine, lan kaupasaksi antuk Prajuru Desa, yan babalon punika kari pageh;
- (3) Mungguing wawanengan babalon luh, ring indik wawarisan, minakadi sane saos-siosan, nganutin uger-uger sane karajegang antuk Sang Amawarat.

Palet 4**Indik Sentana****Pawos 46**

- (1) Mungguing sentana wenten kalih soroh:
ha. Preti sentana;
na. Sentana peperasan.
- (2) Prade pawiwahan tan ngewentenang sentana, kengin meras sentana maupasaksi sekala niskala sane kewastanin peperasan;
- (3) Peperasan sane kasinanggeh patut utawi sah ring desa ri sampun macihna:
ha. Ngamargiang upacara peperasan;
na. Kasaksinin olih Prajuru Desa, saha kesiarang ring paruman;
ca. wenten lekita pamikukuh saking Sang Amawarat;
- (4) Sane dados keperas keanggen sentana kadi ring sor puniki:
ha. Anak sane meagama Hindu;
na. Kulawarga saking purusa, yan tan wenten kengin saking pradana, prade taler tan wenten wawu dados sekita karep.

- (5) Prade wenten sinalih tunggil krama desa meras pianak lanang wiadin istri sesampun kesungkemin antuk kulawarga, dadia, tur kakukuhang olih Sang Amawarat wau kadadosang tedun makrama.

Palet 5**Indik Wawarisan****Pawos 47**

- (1) Luire sane wenang kawarisin :
- ha. Among-amongan ring desa, ayah-ayahan saurah-arih;
 - na. Utang-piutang sang kawarisin;
 - ca. Saraja due, brana, tegal, carik, tatamian, sakanan kasugihan.
- (2) sane wenang ngawarisin :
- ha. Manut lalintih papernahan adoh tampek saking purusa tunggal sidhikara, tunggal dadia;
 - na. Sangkaning polih pitemes saking sang kawarisin sang madue saluir sane dados kawarisang, saking palugrahan Sang Amawarat, pinih akeh apahtigaan saking padueyan nyane maka pioli-oli pagunakayan;
 - ca. Putra paperasan.
- (3) Sang sapisira ugi krama desa, yan tilar saking agama Hindu, tan yogya ngawaris sane kamulan patut warisin;
- (4) Ngedum wawarisan, kapatut pinih sor sasampun puput maabenang kalih ngalinggihang pitara sang ngawarisang brana kalih kasugihan punika. Sane dados dum, sajaba mangge padagingan pangaci-aci, minakadi saluiring sane mange. Piranti ngalaksanayang upacara agama, pustaka-pustaka sane kapingitang saluir ipun.

SAPTAMAS SARGGAH**WICARA LAN PAMIDANDA****Palet 1****Indik Wicara****Pawos 48**

- (1) Saluiring wicara indik adat ring wawidangan desa, wenang rinaosan antuk Prajuru Desa. Yan tan kasidan puput, Prajuru Desa ngaturang ring Sang Amawarat;
- (2) Yan wenten wicara indik adat ring banjar, pamaksan, minakadi sekaa-sekaa siosan, yogya kabaosan antuk prajurunia soang-soang, yan tan kasidan puput, wenang katengahang ka desa, Prajuru Desa yogya mamaosin;
- (3) Yan pamutus wicara sane katiwakang antuk Prajuru Desa tan katinutin utawi tan kairing antuk sang mawicara, wenang sang mawicara nunasang pangraos ring sang patut mamaosin;
- (4) Yan sang mawicara tan tinut ring pamutus wicara sane katiwakang inucap ring ajeng, prasida sang mawicara tan kalugra polih patulung saking desa.

Palet 2
Indik Pamidanda
Pawos 49

- (1) Luir pamidanda sane wenang katiwakang antuk Prajuru Desa, banjar adat, pamaksan, sekaa-sekaa siosan, sawawengkon desa, sakadi ring sor puniki :
 - ha. Danda artha;
 - na. Upasaksi, dewa saksi, pangrarata, sumpah;
 - ca. Danda panyangaskara, luire; mrayascita, marisudha, miwah saluir ipun;
 - ra. Pamidanda siosan manut palugrahan Sang Amawarat.
- (2) Patiwak pamidanda, manut ungguan wicarane soang-soang, minakadi werat ringan wicara inucap, luire :
 - ha. Yan wicara ring desa, yogya kapidanda antuk desa. Mungguing dadandan mantuk ka desa;
 - na. Yan wicara ring banjar, yogya kapidanda ring banjar ika, dadandan mantuk ka banjar;
 - ca. Yan ring pamaksan, minakadi ring sekaa-sekaa siosan, katiwakang pamidanda ring kuwu tempekania soang-soang, Mungguing dadandan mantuk ka kuwu tempekania soang-soang.
- (3) Agung alit dadandan, manut panglokikan agung alit werat ringan kasisipane sane mungguh ring Awig-Awig gagaduhan soang-soang, minakadi pararem pinaka pamutus Paruman.

ASTAMAS SARGGAH
NGUWAH-NGUWUHIN AWIG-AWIG

Pawos 50

- (1) Sane wenanguwah-uwuhin inggih punika, Awig-Awig, pasukerthan, pararem, wiadin kaputusan paruman miwah sane siosan sapanunggilan ipun;
- (2) Nguwah-nguwuhin Awig-Awig, pasukerthan, pararem, wiadin kaputusan paruman miwah sane siosan, manut tata kramaning paruman;
- (3) Indik nguwah-nguwuhin Awig-Awig, manut tata kramaning paruman sasampun nunas tatimbang ring Sang Ngawiwenangang.

NAWAMAS SARGGAH

PAMUPUT

Pawos 50

- (1) Awig-Awig puniki mawasta Awig-Awig Desa Adat Batugunung;
- (2) Awig-Awig puniki pinaka bantang sahananing Awig-Awig, pararem, pasukertan, miwah saluir ipun, sane mangge ring banjar adat, Pamaksan, sekaa-sekaa sane wenten sajeroning Desa;
- (3) Banjar, Kahyangan, Pamaksan, sekaa-sekaa sane wenten sajeroning desa, wenang ngawangunang Awig-Awig, pasukerta, pararem, gagaduhan soang-soang, nanging daging ipun tan yoga singsal ring Awig-Awig Desa;
- (4) Saluiring sane durung munggah ring Awig-Awig puniki, kaunggahang sajeroning pararem saking pamutus Paruman Desa;
- (5) Dresta sane kantung dados angge, yan tan tungkas ring daging Awig-Awig Desa, manut ring uger-uger nagara, saha kaputusan sajeroning Paruman Desa;
- (6) Awig-Awig Desa, kawangun antuk krama Desa Adat Batugunung, kapastika manut Upacara agama Hindu, kala dina; Buda Wage, Wara Kulau, sasih...., tanggal ping..., rah..., tenggek..., Isaka, 19..., magenah ring Pura Puseh Desa Adat Batugunung, kapuput Ida
- (7) Awig-Awig puniki kalinggatanganin antuk Prajuru Desa, luire : Bandesa, Pemadhen Bandesa, Panyarikan, Juru Raksa, Juru Arah, kasaksinin antuk Kelihang Banjar Adat Batugunung, Kelihang Banjar Dinas Batugunung, Perbekel Bukit, Camat Karangasem, kakukuhang antuk Bupati Karangasem;
- (8) Awig-Awig puniki kalaksanayang ngawit dina pamastika punika kantos salantur ipun;
- (9) Luir sang ngalinggatanganin :
ha. Prajuru Desa :

Bandesa,

I Nyoman Wijaya, S.Pd.

Pemadhen Bandesa,

I Wayan Putu Widyanata.

Panyarikan,

I Made Dwija Negara.

Patajuh Panyarikan,

I Wayan Pariasa

Juru Raksa,

I Gede Putra Gunawan.

Patajuh Juru Raksa,

I Made Aditya Sugiharta

Juru Arah,

I Wayan Sudana.

Kelihang Banjar Adat Batugunung,

I Nengah Karang.

na. Maka saksi :

Kelihang Banjar Dinas Batugunung,

I Made Putra Widyartha.

Perbekel Bukit,

I Wayan Sudana, SH.,MAP.

Camat Karangasem,

Cokorda Alit Surya Prabawa, S.STP

Pembina
NIP. 19771121 199612 1 002

ca. Bupati Karangasem pinaka murdha pamikukuh
Kalekitayang ring Kantor Bupati Karangasem,
duk rahina
tanggal Masehi
Reg. Nomor :

BUPATI KARANGASEM,

I GUSTI AYU MAS SUMATRI, S.Sos. MAP